



Is iniziants ed ospitants da l'event internaziunal cun in dals gronds stars da la saira da gala: Antonio Sellitto, Xherdan Shaqiri ed Alessandro Sellitto (da san.).

Vesair ed esser vesì è il motto

Tavau: 11. Notg da sport internaziunala

DA GION NUTEGN STGIER / ANR

■ Passa 600 personas èn stadas da la partida a l'occurrènza che vegn er numnada il «FEM dal sport». Undrads cun in «award», in cristall, èn vegnids anteriurs sportists ed actuals sportists. In da quels è per exempel Didier Cuche, en il fratemp ina vaira legenda da skis. La Notg da sport internaziunala è en il decurs dals davos 11 onns avanzada tar ina occurrènza populara nua che betg mo la prominènza da sport s'entaupa, mabain er bleras personalitads da l'economia e da la politica. Is iniziants ed ospitants da l'event internaziunal, Antonio Sellitto ed Alessandro Sellitto èn duas personas che han in contact sco paucs auters cun personalitads da sport nazionalas ed internaziunales. A bab e figl reussescha mintg'onn da carmalar personas da num e pum a Tavau per assister a l'occurrènza. Glorius e famus, vesair ed esser vesì, quai è davairas il motto tar quella saira da gala. A medem temp cun la Notg da sport internaziunala vegn a Tavau er gist dà l'entschatta a la stagiun d'enviern. In ulteriur motiv per la societad illustra da vegnir en noss chantun e sa mussar generus per la fundaziun «Wings for Life» che sustegna la perscrutaziun da paraplegia. Quai è l'intenziun principala, sper l'onurificaziun da sportistas e spor-

tists, da la Notg da sport internaziunala.

Er imprendier da perder

En ses pled da bainvegnì ha Tarsizius Caviezel, da preschent landamma da Tavau ed anteriur president dal HCD, ditg che talents da sport hajan tiers quai er in ferm caracter. Tar il sport sajan betg mo victorias e medaglias da gronda impurtanza, mabain er la cuminanza e la vita sociala sajan dus ulteriurs aspects fitg impurtants. Er imprendier da perder tutga tar ina carriera da mintga singul sportist, ha menziunà il Lumnezian. «Politichers e sportists vivan da lur talent, cun la differenza che politichers vilentan savens la generalitad ed ils sportists fascineschan quella», ha ditg Tarsizius Caviezel.

Veglia e passiu

Tarsizius Caviezel ha lura er surdà il «cristal-award» a Sean Simpson, il trenader da l'equipa da hockey svizra. El è ses team han retschet quel premi per lur success tar il campinadi mundial da hockey 2013 a Stockholm. Per avair er en il futur success e cunzunt tar ils gieus olimpics 2014 a Sotschi hajan ils hockeyaners da giugar cun la medema veglia e passiu sco a Stockholm, ha ditg Sean Simpson. Suentar la medaglia d'argient tar il davos campinadi mundial da hockey saja dentant difficultus da repeter


quel success, ha ditg il trenader. Undrà è er vegnì Didier Cuche, l'antierur skiunz che ha gi en sia carriera gronds success. Segir sajan las numerusas victorias stadas ina culminaziun en sia carriera, però il punct culminant saja stà da terminar sia carriera cun plaina sanadad, ha ditg Didier Cuche als 600 preschents.

Bler applaus per Shaqiri e Sempach

Retschet in cristall per lur prestaziuns extraordinaras han er Xherdan Shaqiri, il ballapedist dal FC Bayern ed il lutgader Matthias Sempach. Els dus èn lura er stads quels sportists che han retschet dal public il pli grond applaus. Xherdan Shaqiri ha ditg che a partir dad oz cumenza el danovamain a trenar. El haja dumagnà bain in test da curren da 20 minutas e suenter quel survegnì gisch verda per cumenzar cun il trenadi. Matthias Sempach, il retg-lutgader da Burgdorf, ha ditg: «Per trais emnas vom jau uss en l'Argentina e suenter quellas vacanzas entschaivan las preparaziuns per la proxima stagiun, cun la lutga da Kilchberg, che haja lieu be mintga sis onns». Undrà èn er vegnì Fabio Leimer, il campin mundial da la furmla 2 e surdà il cristall ad el ha Valon Behrami, il star da ballape svizzer che gioga en Italia cun Napoli. In premi han er retschet Alex Frei, Danny MacAskill e Jasmin Nunge.



Karl Frehsner (san.) ha surdà il cristall a Didier Cuche.



Elias Ambühl, il Grischun e star da «freeski» cun sia amia Sarah Pedrett.



Dus ulteriurs sportists da noss chantun: Alex Fiva (ski cross) e Gino Caviezel (ski alpin) (da san.).



Adina da la partida, l'antierur skiunz talian Kristian Ghedina e sia partenaria Patricia Auer.



Dus lutgaders cun il retg da lutga: Adrian Laimbacher, Matthias Sempach ed Andreas Ulrich (da san.).



In premi er per Alex Frei (dretg), qua cun Jann Billeter, il moderatur da la saira.

FOTOS G. N. STGIER/FLICKR.COM



Valon Behrami, il ballapedist da Napoli cun sia amia Elena Bonzannini, il fotomodel talian.



Er preschents a la saira da gala Gregroy Sciaroni, Marc Gianola e Leonardo Genoni dal HCD (da san.).



Christa Rigozzi en discurs cun Murat Yakin, trenader dal CB Basilea.